

隋園詩話

十一

六

內	閣	文	庫
三	九	六	號
函	架	冊	類

漢	書	門
三	九	六
一	〇	〇
〇	三	〇
冊	架	函

內閣文庫	
番號	漢 3960
冊數	10 (6)
函號	363 152



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



Kodak, 2007 TM. Kodak



隨園詩話卷十

沈瘦岑以女妻
漁樵士著

江寧吳樸字元理應童子試時年才十三舉止端肅因
喚入署啖以果餌旋卽入泮邑中名士沈瘦岑以女妻
之嗣後十年不復相見詩人李晴洲告予曰元理小秀
才近詩日佳比其外舅駸駸欲度驂騑前矣歸其迎秋
一首云碧天靄靄暮山晴一片秋心趁月明著浪漸教
葵扇棄風高已覺葛衫輕繞塔草色籠烟淡隔樹蟬聲
咽露清爲讀離騷更漏永幽蘭時有暗香迎未幾元理

暑
清
全

來讀余外集呈二律云陶令無官通刺易崔儵行室入
門難又曰傳有其人應久待我生雖晚未嫌遲是年與
周青原同受知于學使李鶴峰拔貢入都予喜賀以詩
云人夸籍湜居門下我道班楊在意中

余以紫玻璃鏡窻一時咏者甚多太倉聞省謙云一天
花氣鏡邊浮朶朶晴霞入望收檻外電光何處雨山中
暮色最宜秋尤貢父云四面有山皆夕照一年無日不
花光

江寧高廟僧亮一工栽菊能使月月有花戊辰秋席武
山別駕招余同蔣用菴侍御姚雲岫觀察同往賞花用
菴分得有字韻詩云天地之大何不有造化乃出山僧
手山僧一手種菊花花高十尺大如斗四時羣卉遞凋
殘僧寮月月如重九石頭城外普陀菴相思半載游終
負初冬髯八書相招盍簪花下中山酒座客呼僧相晤
貽問訊神方乞誰某僧云我絕勘師傳蘊崇祇在三時
厚料寒暄細鋤泥剔穢芟蕪重縛帚雨無苦濕晴無
乾如期各有神明壽此言雖小可喻大士夫身世宜遵
守萬物從來栽者培枯苑紛紛都自取東風桃李劇芳

妍此時可保穠華否經得冰霜受得春畢竟此花能耐
久坐中聽者大軒渠花亦從旁如點首街鼓催人月到
窻簾輿還帶餘香走

關防二字見隋書酷吏傳原非作官者之美名故余知
江寧時記室史正義著湘時出狎遊子愛其才而不禁
也其南歸留別得青字云浪跡深漸水上萍漫勞今夜
餞郵亭影從久客無多綠燈入籬籬分外青海國歸颿
隨候雁天涯知己賸晨星何時載得蘭陵酒重向紅橋
共醉醒又曰酒沾雙屐雨人坐一庭烟

六安秀才夏寶傳生而任俠出雅雨盧公門下盧謫戍
軍臺僮僕無肯隨者夏奮曰我願在竟策馬出塞三年
後與盧同歸盧再任轉運爲捐學正一官所以報也程
魚門題其橐中集云磨刀冰作石煖客火爲衣盧亦有
句云手僵常散轡泪凍不沾衣可想見塞外之苦矣乾
隆庚子科以年過八十 欽賜舉人陳古漁贈句云八
旬鄉榜無消息一紙天書有姓名又曰三微尙却連城
聘一諾能輕萬里行

蘇州顧祿百張匠門先生外孫也晚年不過爲歸愚先

生權記室凡先生醉應之作皆顧捉刀咏紅葉云秋樹
忽春色曉山皆暮霞余常嘆陸放翁臨終詩猶望九州
恢復而終于國亡家破不遂其願祿百有句云散關鐵
馬平生願愁絕他年家祭時

蔣心餘太史居金陵時除夕夢與余登清涼山得句云
三春花鳥空陳迹六代江山兩寓公開山寺鐘鳴擲筆
而寤

唐人詩曰欲折垂楊葉回頭見髻絲又曰久不開明鏡
多應為白頭皆傷老之詩也不如香山作壯語曰莫道

桑榆晚餘霞尚滿天又宋人云勸君莫惱鬢毛斑髻到
斑時也自難多少朱門年少子被風吹上北邙山

杭州布衣何琪字東甫咏簾鈎云高牽纏臂金無色誤
觸搔頭玉有聲金銀花云可能華屋開常好只恐柴門
種亦難

學問之道四子書如戶牖九經如廳堂十七史如正寢
雜史如東西兩廂注疏如樞闈類書如厨櫃說部如庖
漏井匱諸子百家詩文詞如書舍花園廳堂正寢可以
合賓書舍花園可以娛神今之博通經史而不能為詩

者猶之有廳堂大厦而無園榭之樂也能吟詩詞而不博通經史者猶之有園榭而無正屋高堂也是皆不可偏廢

江寧涂爽亭善小兒醫能詩年九十餘有句云造物與閒還與健鄉人知老不知年小女病危爽亭活之因來往甚歡辛丑九月以書來訣一切身後事親自檢校予晚聯云過九秩以耆終從古名醫都登上壽痛三號而未已傷吾老友更失詩

或傳程漁門京中移居詩云勢家歇馬評珍玩冷客攤錢問故書予笑曰此必琉璃廠也詢之果然因記商賈意移居周蘭坡與萬晴初訪之見門對云豈有文章驚海內從無書札到公卿萬笑曰此必商公家矣詢之果然

王菊莊孝廉名金英性孤冷而工詩有殘雪墜仍起如塵空際盤之句余尤愛其楊柳店夢歸云征騎尙棲楊柳岸歸魂已到菊花庄杖藜父老聞聲喜停織山妻設饌忙生菜摘來猶帶露新醅筍得已聞香堪憐稚女都齊膝羞澁牽衣立母旁掌教永平書院云生徒散後庭

階靜知已逢來禮法疎
邗溝云負郭人家隄下住
酒帘

颺出樹梢頭

魯星村猫迎落花戲魚負小萍
移與宋笠田護籬小犬
吹生客曝背老翁調幼孫
之句皆詩中有畫魯沙橋道
上云山下竹林林下屋
門前溪水帶花流
王蘭泉方伯
雲陽驛云明月似霜霜似雪
雲陽驛外夜三更

顧寧人讀書未見鄭夾漈
交友不交毛西河亦奇

晴

為有句云開卷古人都在眼
閉門晴雨不關心龔旭開
登石臺詩云短牆南畔接烟林
啼罷山禽又海禽甚日

晴明甚日雨不曾出口不關心
抑何暗合耶龔有連理
枝詞云曉尚衣衫薄未許開
簾幙小婢來言東風料峭
動花鈴索海棠軒外石闌邊
有風箏吹落

山陰布衣茅商隱客死汴城
桑葢甫為梓其詩晚村云
帶聲鴉易樹偶語客歸村
山行云郭外鷗鷺眠野草墳
前翁仲戴山花皆佳句也
越中故事娶新婦至必選處
女迎之號曰伴姑
茅吟曰十六作伴姑含情語鄰姆
今日新嫁娘問年才十五

王進士又曾字穀原詩工遊覽
同人看白蓮云船牕六

扇拓銀紗倚漿風前落晚霞依約前灘涼月晒但聞花
氣不看花臯亭來在省年時香飲蓮筒醉不辭莫怪花
容渾似雪看花人亦髻成絲遊陶然亭云岸蘆逆筍妨
遊屐林蝶翻灰浣袷衣春濃轉怕形人老官冷真宜伴
佛閒皆傳誦一詩有丁辛老屋集

岳水軒名夢淵爲督撫上客居與隨園相近丁丑秋忽
作詩會大集名流其豪氣猶勃勃可想江行云荻港人
維雪裏舟雪花飛較荻花稠篷牕人醉荻中臥時被雪
花飛上頭荷花云蘭舟載麗人搖入荷花蕩亭亭紅粉

姿花與人相彷彿其中有蓮的心苦惟儂賞欲以擲奉郎
生憎金釧響兩詩有古樂府遺音

金江聲觀察名志章在吾鄉與杭厲齊名壬子月夜登
虎邱云一片深宵月明明照虎邱松杉交影靜蘋藻上
階流夜舫吹簫客春燈賣酒樓他鄉有朋好竟夕此淹
留庚辰年余過虎邱山僧出此詩見示不知余故觀察
年家子也尤愛其過冷水舖云白鷗傍聚自雙浴黃蝶
逆風還倒飛宿靈隱云窻虛暗覺雲生壁夜靜時聞雨
滴階

或聞劉勰言陸機亦有鋒穎而腴詞勿剪終累文骨近
曰才人如寶意魚門時蹈此病余曉之曰韋端已云屈
宋亦有蕪詞應劉豈無累句但須精選斯文者食馬留
肝烹魚去乙可耳此極元集之所由作也

漢杜欽兄弟任二千石者十人欽官最小名最著韓文
公之孫袞中狀元後人但知布衣方干不知狀元韓袞
甚矣人傳不在官位也唐人詩曰孟簡雖持節襄陽屬
浩然簡之名自在浩然下然余到桂林見獨秀峰有簡
題名筆力蒼古今之持節者如孟簡其人亦少矣

薛中立幼時見蝴蝶咏詩云佳人偷樣好停却繡鴛鴦
大爲乃翁生白所賞且云宋時某童子有句云應是子
規啼不到致令我父不還家都是就一時感觸竟成天
籟

閨秀少工七古者近惟浣青碧梧兩夫人耳碧梧咏李
香君媚香樓云秦淮烟月板橋春宿粉殘脂膩水濱翠
黛紅裙競粧裹垂楊勾惹看花人香君生長貌無雙新
築紅樓喚媚香春影亂時花弄月風簾開處燕歸梁盈
盈十五春無主阿母偏憐小兒女弄玉雖居引鳳臺蕭

郎未遇吹簫侶，公子侯生求燕好。輸金欲買紅兒笑，桃花春水引漁人。門前繫在遊仙棹，奄黨織兒想納交。纏頭故遣狡童招，那知西子含顰拒。更比東林結社高，樓中剛耀雙星色。無奈風波生頃刻，易服悲離阿軟行。重房難把臺鄉匿，天涯從此別情濃。錦字書憑若个通，桐樹已曾棲彩鳳。繡幃爭肯放遊蜂，因愁久已拋歌扇。教坊忽報君王選，啼眉擁髻下粧樓。從今風月憑誰管，柘枝舊譜唱當筵。部曲新翻燕子箋，總爲聖情憐靚覲。桃花宮扇賜簾前，天子不知征戰苦。風前且擊催花鼓，阿

監潛傳鐵鎖開，美人猶在瓊臺舞。銀箭聲殘火尚溫，君王匹馬出宮門。西陵空自宮人泣，南內誰招帝子魂。最是秦淮古渡頭，傷心無復媚香樓。可憐一片清溪水，猶向門前鳴。邑流碧梧卽孫雲鳳，和余留別詩者有姝蘭友名雲鶴亦才女也。咏指甲作沁園春云：雲母裁成春冰碾，就裏任葱尖。憶綠窻人靜，蘭湯悄試，銀屏風細。絳蠟輕彈，愛染仙葩，偶調香粉，點上些兒玳瑁斑。支頤久有一痕鈎影，斜映腮間。摘花清露微粘，剖繡線雙虹。掛月邊把霓裳暗拍，代他象板藕絲，自雪搯个連環未

斷先愁將修更惜女伴燈前比並看消魂處向紫荆花
上故違織織

梁文莊公弟夢善字午樓生富貴家而娟潔靜好孟子
所謂無獻子之家者也年十五舉子鄉六上春闈不第
出宰蠡縣非其志也年過四十而卒出都一首便覺不
祥其祠云何處人間有鴈聲暮雲無際且南征西風禾
黍臨官道落日牛羊近古城生意漸如衰柳盡浮生只
共片帆輕勞勞踪跡年年是淒絕天涯此夜情咏熏爐
云夢去恰疑懷墮月抱來錯認玉爲烟飲沈椒園太史
家云微吟韻許追前輩中酒身還耐薄寒述懷云洗馬
清羸潘令髻外人剛認一愁無皆清詞麗句楚楚自憐
亦有壯語如出塞不辭三萬里著書須計一千年恰不
多也

國初逸老某贈妾云香能損肺熏宜少露漸沾花採莫
類王健菴妻張瑶英示兒云教兒寶鴨休添火龍腦香
多最損花瑶英有繡墨詩集余已爲刊刻矣茲再錄其
佳句送健菴云縱無多路情難別須念衰親遊有方病
目云豈爲愁多清淚落却綠烟重午炊遲偶成云無夢

不愁鷄唱早有書只望雁飛過荒院草刪三徑瀾破牕
風入一燈危蛛知網濕添絲急月待雲開到檻遲
戊戌春余在杭州兩姬置酒招女眷遊西湖瑤英以詩
辭云呼女牕前看刺鳳諫兒燈下學塗鴉韶光一刻難
虛擲那有閒看湖上花既而遣人劫之曰娘子不來怕
作詩耶果飛輿而至到湖心亭書二十八字云釀花天
氣雨新晴一片清光兩岸平最好湖心亭上望滿堤人
似水中行

李宏猷秀才設帳尹制府署中咏新竹云節已凌雲未
出頭未幾病重薦其友周青原入署相代青原來見補
中出西園池上詩云目不窺園已浹旬小池春漲綠鱗
鱗得魚鳥勝垂綸客臨水花如炤鏡人欲掃閒庭苔莫
損偶扳芳樹蝶相親笑余三月裘還着只爲調停病起
身末句余略爲酌改周欣然辭出良久聞門外尙有吟
哦聲則以肩輿未至故得意而徐步呻吟也其風趣如
此後官中書在京師寄懷云我如脫銜駒恣意騁原隰
不讀五千卷輒入崔嵬室又如餽丹鼠吐腸還自悼空
得成連師未諳水仙操川雖難學海磁則曾引針千秋

一辨香頂禮優盃林

金陵妓郭三爲訟事江寧王令拘訊之香亭爲闢說求
免王覆札云昨承簡翰誠恐狼藉花枝欲於園中立五
彩旛使封家十八姨莫逞其勢然弄郭郎者只是逢場
作戲須俟上臺時看作如何扮演再理會下場可耳香
亭乃寄詩云一波才定又生波屢困風姨可奈何不是
花奴偏惹事總緣柳弱受風多登場更比下場難牛鬼
威風色已寒要識李夫人面目何如留待帳中看
秦郵沈均安字際可官江右以廉潔稱能詩工書出韻

邑令擢蓮花廳司馬留別邑人云民稱張旭書堪寶我
比時苗犢並無

真州鄭中翰雲字晴波新昏北上留別閨中云來年春
到江南岸楊柳青青莫上樓其同年周舍人發春喜誦
之時有陳庶常濂與周相善而未識鄭一日公讌處周
鄭俱在陳忽語周曰昨聞有人贈內之句情韻絕佳當
是晚唐人手筆周急叩之則所稱者卽鄭詩也鄭聞而
愕然周因指鄭示陳曰此卽賦楊柳青青之晚唐人矣
三人大笑真州程灌夫亦有句云春風自綠垂楊色何

事羈人怕倚樓

寶意先生告余云已卯秋過龍潭見旅壁題詩四絕清麗芊綿後書桂堂二字橫胸中數十載終不知其爲誰題作秦淮偶興云淡黃楊柳曉啼雅絲雨溫香濕落花應有鮑魚吹雪上水邊亭子正琵琶水榭湘簾特地清朝烟上與曲闌平舊時紅豆拋殘處只恐風吹子又生籬門過雨綠烟鋪檀板金尊俗有無小艇已將烟月去人間空說女兒湖鱗鱗碧瓦炤春菜簪并宵深鳥語哀第一林泉誰省得數枝猶發舊宮槐

冬友自言九歲時侍先大父過淮舟中人限吞字韻爲詩多未穩予有句云橫橋風定帆全卸小艇潮來勢欲吞大父曰此子將來必無患苦或問其故曰凡詩押啞韻而能響者其人必貴押險韻而能穩者其人必安生平以此衡人百不失一大父諱馨字星標

吳中七子中趙文哲損之詩筆最健丁丑召試與吳竹嶼同集隨園愛誦余無情何必生斯世有好都能累此身一聯後從溫將軍征金川死難軍中過襄陽時以懷諸葛故居詩四首見寄云洵美躬耕地千秋一草廬勛

名微管亞出處有莘如巾服漁樵襄川原戰陣餘西風
渭濱路尚憶沔南居四海占龍臥蕭條一畝宮泊如明
厥志行矣慎吾躬變化遭非偶棲遲道豈窮可知出師
表慷慨本隆中崔徐二三子來往定欣然逸事風塵外
高評月旦前襟期梁甫曲生計漢陰田當日如終隱鴻
妻亦最賢宇宙聲名大遺踪錦水長人歌千尺柏公念
百枝桑涕尚沾遺老魂應戀故鄉溪毛如可薦此地合
祠堂

江賓谷在楚中寄信托家人山莊栽樹云老去菟裘身
後冢他年都要此中來何言之親切而有味也漢上喜
晤汪丈云他鄉執手感前盟白髮垂肩閱變更問舊可
堪皆後輩抱書猶記拜先生漸成安土如秦贅別後添
丁盡楚聲客况中年復誰遣一尊寒雨故人情
香亭弟隨叔父健磐公生長廣西叔父亡後余迎歸故
里年十五卽見贈云坐無尼父爲師易家有元方作弟
難又卽目云山氣騰空欲化雲余早知其能詩也孤甥
陸建號豫庭字湄君幼爲余所撫養與香亭同歲己巳
春余辭官挈兩人讀書隨園時相唱和後子官秦中二

人過隨園見憶香亭云共尋幽徑訪柴扉遙見高臺出
翠微蠟屐重臨秋色冷青山如故客情非枯荷帶雨碧
連水荒蘚盈庭綠染衣滿樹寒鴉鳴不已斜陽烟草更
依依豫庭云自別青山兩載餘風光較昔更何如竹梅
添種堦前樹詩史空堆架上書窗外葉飛人去後天邊
月冷雁來初灞橋此日秋風早應向江南憶故廬豫庭
贅于宿州刺史張公處張名開士字軼倫杭州壬戌進
士歷任有循聲謂豫廷曰作時文則我教鄉作詩則鄉
教我豫庭年三十餘以瘵亡張忽忽不樂如支公之喪

中

法處也月餘亦亡豫庭贈婦翁云喜我絳紗深有托半
爲嬌客半門生贈婦云未有凶能憑我割不妨酒更阿
卿謀張詩亦佳衍華嚴寺云竹裏琴聲秋澗落定甲燈
火石牀分感懷云臣心自問清如水世道尤難面似弦
余三妹皆能詩不愧孝綽門風而皆多坎坷少福澤余
已刻三妹合稿行世矣茲又抄三人佳句以廣流傳三
妹名機字素文秋夜云不見深秋月影寒只聞風信響
闌干問庭落葉知多少記取朝來着意看閒情云欲捲
湘簾問歲華不知春在幾人家一雙燕子殷勤甚衝到

廳前盡落花他如女嬌頻索果婢小娘梳頭怕引游蜂
至不栽香色花皆可誦也過人不淑卒於隨園香亭弟
哭之云若爲男子真名士使配秦軍信可人無家枉說
曾招婿有影終年只傍親禿庭甥哭之云誰信有才偏
命薄生教無計奈夫狂白雪裁詩陪道蘊寺燈說史侍
班姑

四妹名杼字靜宜遊鷓鴣鳴寺云蒼蒼烟樹帶斜暉石搭
肩巒傍翠微無復蕭梁宮殿在臺城猶見紙鷲飛秋闈
踏月云藹藹山光映碧空參差樹影亂西風蘆花幾朵

明如雪吹在橫橋曲澗中他可誦者如描花嫌紙窄學
字借書抄賓鴻雲作路蟋蟀草爲城畫閣偏聞雛燕語
亂書常被獺貓眠課文云花簪一朵休嫌少字課三張
莫厭多挽葛姬云斷線幾條猶委地南樓一榻已生塵
堂妹棠字秋卿嫁揚州汪楷亭家頗溫飽伉儷甚篤咏
燕云春風燕子今年早歲梁間補舊草華堂叮囑主
人翁珍重香泥莫輕掃吁嗟乎千年田上尚滄桑那得
雕梁常汝保余讀之不樂口詩雖佳何言之不祥也已
面竟以媿難亡又二年楷亭亦卒妹寄二兄香亭云鵬

程人與白雲齊君獨年年借一枝開道故交多及第更
憐歸客尙無期琴書別後遙相憶雪月噫前寄所思常
對芙蓉染衣鏡堪嗟儂不是男兒干歸揚州云不堪回
憶武林春嬌養曾爲膝下身未解姑嫜深意處偏郎愛
作遠遊人綠楊堤畔行遊子紅粉樓中冷翠帷爲問秦
淮江上月今宵照得幾人歸亡後香亭哭以詩云最苦
高堂念懷中小女兒至今傳死信未敢與親知書遠慕
多誤人稠語屢岐調停兩邊意暗泣泪如絲

余在蘇州四妹寄懷云長路迢迢江水寒蕭蕭梅雨客
身單無言但勸歸期速有淚多從別後彈新暑乍來應
保重高堂雖老幸平安青山寂寞煙雲裡偶倚闌下忍
獨看余讀之凄然當卽買舟還山四女乘姑從妹受業
妹贈以詩云有女依依喚阿姑忝爲女傳教之無欲將
古典從容說失却當年記事珠妹嫁韓氏生一兒名執
玉十四歲咏夏雨云澗回青簾色涼逼采蓮人學使寶
東臯先生愛之拔入縣學未一年得暴疾亡日將瞑矣
忽坐起問阿母曰唐詩舉頭望明月下句若何曰低頭
思故鄉嘆曰果然遂點頭而仆故妹哭之云傷心欲拍

靈床問兒任何鄉是故鄉

詩有情至語寫出活現者許竹人先生督學廣西接弟
石榭凶問云望書眼欲穿折書手欲爭抱書心忽亂隔
紙字忽明揮手急屏置忍淚兩暗傾老親中庭立念遠
心懸旌病訊百計匿矧可聞哭聲違心方飾貌哀抑喜
且盈趨言夢弟至所患行已乎

隨園每至春日百花齊放家中內子及諸姪人輪流置
酒爲太夫人壽太夫人亦嘗設席作答余有句云高堂
戒我無他出阿母明朝作主人蓋實事也香亭同賞梅

詩云爲愛梅花做綺筵合家春聚畫堂前忽憐香氣傳
風外却喜花開在雨先人影共分千竹翠簾光高捲一
山烟知他萬片隨雲去還赴瑤樓讌列先嗚呼自先慈
亡後此席永斷而香亭亦遠宦粵中矣

江寧城中每至冬月江北村婦多渡江爲人傭工皆不
纏足間有佳者秦芝軒方伯席上集唐句戲云一身兼
作僕兩足白子霜

桐城詩人分咏古鏡方正瑗云絕代應憐顏色少六宮
曾識舊人多姚孔鐸云相對不知何代物此中曾老幾

朝人皆荏旬也姚又有句云病後精神當酒怯靜中情
性與香宜

余已未座主爲泰安相國趙公仁圃公以長垣令有政
聲受知 世宗晉秩卿貳平生愛時文雖入綸扉猶手
校成宏諸大家孜孜不倦晚泊小米灘一絕云回棹艤
艇傍平沙客路停舟便是家座久鳥驚山吐月話長人
喜燭生花作令時以勘災故足浸水中三日故病敗每
入朝許給扶以行

余習 國書讀十二鳥朱受紫丁鄒泰和學士記其丁

香一首云春空烟鎖綴星星兩樹瓊枝占一庭交網月
穿珠絡索小鈴風動玉冬丁傍簷結密人難折拂座香
多酒易醒只恐天花散無迹擬將湘管寫娉婷又白雲
寺云飛鳥沒邊孤塔見亂山缺處夕陽明先生戊戌翰
林和雅謙謹有愛貓之癖每宴客名貓與兒孫側坐賜
孫肉一片必賜貓一片曰必均毋相奪也督學河南按
臨商邱畢出署夫一貓嚴檄督縣捕尋令苦其煩用印
文詳報云卑職遣幹投四人挨民家搜捕至今逾限憲
貓不得

陝西薛寧庭太史與江寧令陸爾村爲同年丙戌到白
門相訪偕公子兩莊與其師高東井泛舟秦淮作詩云
衣帶一條水蘭舟小亦佳南朝留勝覽北客壯吟懷綽
約虹橋束參差畫檻排衝炎偶然出記取始秦淮誰與
偕來者詩人高達夫看山揮玉塵忘暑對水壺乍可清
談足寧教佳句無士龍君弟子架筆也珊瑚

金陵承恩寺僧行舉能詩有句云雨晴雲有態風定水
無痕其師闡乘有五絕云香氣透牕紗風輕日未斜午
堂春睡起雙燕下含花又有句云才展金剛經了了金

剛經夾小吟箋余嘗云凡詩之傳雖藉詩佳亦藉其人
所居之位分如女子青樓山僧野道苟成一首人皆有
味乎其言較士大夫最易流布

余改官江南賦落花詩祁陽中丞內幕程南耕愛而和
之記數聯云燕壘漫教留粉在馬蹄幾度踏香來升沉
我已參名理落莫人還惜異才程名嗣章綿莊先生之
弟中年病聾每來則以筆代口先以一函相訂故余贈
句云見面預安雙管筆焚香先捧一函書

朱學士筠字竹君考據博雅不甚吟詩有登湖樓一律

隨園詩話 卷一
云載月來登湖上樓飄然便可御風游帆如不勤暮天
沒岸竟欲斜秋水流何寺一聲孤磬遠長空萬點亂鴉
愁酒盃頻勸君何苦未使春波負秀州

姊夫王貢南名裕琨雨過富春云歷亂如絲小雨微相
呼舟子授蓑衣魚爭新水穿萍出鳥怯寒風貼地飛宿
霧半藏臨澗屋好花多落釣魚磯紛紛魚艇隨波散撒
網閒歌何處歸寄內云好奉慈姑勤菽水莫同邱嫂憂
杯羹余時年十四愛而記之卽健菴父也

海寧許鐵山惟枚與余同官金陵一時有二枚之稱余
已薦牧高郵而許猶有待意有所感和余河房宴集詩
云朱簾斜捲晚風前楊柳蕭疎隔岸烟一樣樓臺都近
水向南明月得來先圍梅云臘盡還微雪春來尙薄寒
迎風飛片易背日折苞難踈蕊明高閣低枝韻小欄莫
教吹短笛我正倚闌干許性嚴重秦淮小集坐有歌郎
君義形于色將責其無禮而答之余急揮郎去而調以
詩云鬢煞隔簾紗帽客排衙花底打鴛鴦

同試鴻博陳魯章士璠杭州人以諸生中式卽授庶常
途中紀事云月映湖光分外明蘆花影裡一舟橫夜深

聞有鄉音在曉起開篷問姓名

毛西河言古人詩題所云遙同者卽遙和也謝朓同謝
咨議銅雀臺詩盧照鄰同紀明孤雁詩皆是和詩非同
游也

見吳小仙畫騎驢圖題云白頭一老子騎驢去飲水岸
上蹄踏蹄水中嘴對嘴顧赤芳題云張果倒騎驢不知
是何故爲恐向前差忘却來時路

乙亥年高文端公爲江寧方伯過訪隨園余上時云鄰
翁爭美高軒過上客偏憐小住佳亡何巡撫皖江將瞻
園牡丹移贈隨園余謝云忘尊偏愛山林客贈別還分
富貴花兩詩俱以摺扇書之後戊子年公總制兩江招
飲席間出二扇宛然如新余問公何藏之久也公笑曰
才子之詩敢不寶護余自念平日受人詩扇不下千百
都已拉襍摧燒而公獨能愛惜如此不覺感嘆因再作
時獻有句云舊物尙存憐我老愛才如此嘆公難後公
疑于黃河工所口吟云夢中還有夢家外豈無家
張葯齋宗伯予告還桐城兄文和公爲首相作詩送

云七十懸車事竟成輕車遠稱秩宗清幾人引退能如
願先我歸休覺不情圖籍開緘珍手澤墓田作供好躬
耕阿兄他日還初服拄杖花前一笑迎周長發太史和
云從古人倫重老成秩宗真不愧寅清引年久切歸田
志予告翻增戀闕情萬卷縹緗藏古篋一犁烟雨課春
耕龍眠山色春如黛知有羣仙抗手迎清真綿麗一時
和者皆不能及

乾隆癸酉尹文端公總督南河趙雲松中翰入署見案
上有余詩冊戲題云八扇天門詼蕩開行間字字走風
雷子才果是真才子我要分他一斗來

先師史玉璣先生以硃筆書僕固懷恩傳後云懷恩本
不負君恩青史何曾昭覆盆萬里靈州荒草外至今夜
夜泣英魂余時七歲偷讀而記之

余紹祉布衣有黃山詩四首警句云松生絕壁不知土
人住深厓只見烟又白山中人習聞天樂石上松曾見
古皇余遊黃山至佳處嘆其言之果然

余過蘇州許穆堂侍御極夸方大章名燮者之詩蒙以
詩冊見授七古學少陵頗有奇氣七律似明七子錄其

題內子桃園放舟小照云碧桃灣裡聽鳴榔水復山重
路渺茫過此便爲仙世界來時還看嫁衣裳雲中鷄犬
應同聽月下房權好對床願種秫秔三十畝畫眉牕下
話羲皇尹文端公有紫駟馬騎三十年矣憐其老斃以
敝帷瘞之穆堂弔以詩云萬里雲霄空悵望一生筋力
盡馳驅又曰朽骨漫留賢士口敝帷應念主人恩尹公
讀之泣下

人閒居時不可一刻無古人落筆時不可一刻有古人
平居有古人而學力方深落筆無古人而精神始出萍
望張宏勛名棟自號看雲山人工詩善畫與余在長安
有車笠之好同譜中如沈椒園張少儀曹麟書俱顯貴
莊容可官至大學士而宏勛終不一第晚依揚商汪怡
士以終有看雲樓詩集閨怨云鏡臺寂寂掩芳塵又換
深閨一度春除却殷勤花上鳥他鄉應少勸歸人郊外
云春來是處足春遊風轉長堤草色柔客過不須頻勒
馬花扶人影出牆頭

余有汪甥蘭圃名庭萱亦能詩爲貧所累未盡其才有
句云潮落岸從洲外露風高雲向嶺頭平又楊柳護田

蒙綠露桃花隔水墜紅雲皆妙

余在端州豐川令彭翁字竹林雲南人以詩來見有句云一官手板隨人後萬里鄉心入雁先余擊節不已竹林喜見贈云盛世歲星終執戟南華隱吏有隨園雲裏筇才雙足峙鷗邊舫已萬花扶

高要令楊國霖蘭坡作吏三十年兩膺卓薦傲兀不羈與余相見端江東修之餽無日不至聞余遊羅浮歸乞假到鼎湖延候以詩來迎云山麓峰巒秀色殊如何海內姓名無全憑大雅如椽筆為我湖山補道書道書海內洞天

二十四福地三十六梁湖不與焉杖履間從天上來教人喜極反成猜

飛騎為報湖山桂不到山門不許開及余歸時送至十里外臨別泣下口號云送公自此止思公何時已有淚不輕彈恐溢端江水

余丙辰到廣西蒙金撫軍薦入都今五十年矣因訪親家汪太守故重至焉吳樹堂中丞垣引余至署周歷舊遊余席間稱金公任藩司時作官廳對聯云坐此似同舟宦情彼此關休戚須臾叅大府公事何妨共酌商邦意深厚有名臣風味公因誦其鄉人徐公士林作臬司

題庭柱云看堦前草綠苔青無非生意聽堦外鶉啼雀
噪恐有冤魂真仁人之言樹堂見和一律有洞簫聲重
三千玉銅鼓詞傳五十春之句所云銅鼓者丙辰余試
鴻博賦題也金公刻入省志藝文類中今五十載矣重
得披覽恍若前生

桂林向有詩會李松圃比部馬嶸山中翰蒲柳愚山長
朱心池明府朱蘭雪布衣時時分題吟咏余到後得與
文酒之會同訪名山谷剎臨行時五人買舟相送依依
不捨見贈篇什不能盡錄僅記心池云五十年前跨鶴

行重來無復舊同羣一囊新句千絲雪萬疊青山兩屐
雲好古不求唐後碣論文誰撼岳家軍靈臯健筆漁洋
句才力輸公尚十分卅載心驚絕代才何緣杖履得追
陪文章真處性情見談笑深時風雨來一櫂方圓仙掌
外片帆又挂楚江隈湘靈也解延名士九面奇峰次第
開柳愚云筋力登臨老尚優每逢佳處輒勾留誰能鶴
髮六千里來證鴻泥五十秋舊事略知餘白足僧明遠
能談金
中丞遺事殘碑儘擗付蒼頭聞公欲挂湘帆去又向衡山作
勝遊蘭雪云六朝偶戀烟花迹一代先收翰墨勛

松圃父丹臣先生少貧以筆一枝傘一柄至廣西不二十年致富百萬松圃詩才清絕不慕顯榮父子皆奇士也號行云矇矓曙色噪歸鴉風撼疎林一徑斜滿地白雲吹不起野田蕎麥亂翻花蘆荻飛花白滿汀停車小憩水邊亭前林一綫炊烟起畫斷遙山半角青秋思云涼笛聲兼風葉下歸鴉影帶夕陽來

余試鴻詞報罷蒙歸安吳小眉少司馬最爲青盼五十年來其家式爲今年遊粵東過飛來寺見先生題詩半山亭云西徑崎嶇上東峰宛轉行半山山過半飛鳥一身輕讀之如重見老成眉宇先生諱應棻弟諱應枚其封君夢蘇眉山兄弟而生故一字小眉一字小穎小眉巡撫湖北平反麻城冤獄爲海內所稱小穎亦官至禮部侍郎

李懷民與弟憲橋選唐人主客圖以張水部賈長江兩派爲主餘人爲客遂號所咏爲二客吟懷民贈人盆桂云送花如嫁女相看出門時手爲拂朝露心愁搖遠枝送張明府云在縣常無事還家只有身隨行一舟送出滿城入憲橋咏鶴云縱教就平立總有欲高心不辭

臨水久祇覺近人難歷下廳云馬餐侵皂雪吏掃過堦
風送流人云再逢歸夢是數語此生分二果有賈張
風味

余過大庾邑宰袁鏡伊欣然相接自言傾想者三十年
同遊了山又親送過梅嶺自誦雪詩云遠近枝橫千樹
玉徃來人負一身花贈人云雪調靜聽孤唱遠雲程遙
望一痕青本藉宣化故有句云山排雲朔從天下水合
桑瀉入地無皆佳句也鏡伊名錫衡乙酉孝廉有勛貴
過境憐從毆傷平民鏡伊縛置獄中取保辜限狀嗣後
過者肅然

山左朱海客先生名承煦素無一面忽遣人投書署云
上天下大才子某余感其意過京口時訪于海岳書院
先生已七十矣留飲再四余因風揚帆不克小住未半
年先生竟歸道山又六年過其子鑾坡于廣州急索乃
翁詩稿得示內二句云剪刀聲歇栽花後井臼功餘間
字初

余病廣州樂昌令吳公世賢每公事稍暇必至牀前問
訊余愛其詩筆清麗可作陳琳之檄咏釣竿云淇園籊

籬折新枝人到忘機鷗鷺知風雪寒江應憶我英雄末
路悔拋伊羽扇云常使指揮天下事不羞憔悴月明中
皮蛋云個中偏蘊雲霞彩味外還餘松竹烟吳號古心

松江人

海陽令邱公學劬聞余到端州卽馳書與香亭必欲一
見果不遠千里假公事到省暢談竟日餽遺殊厚記其
佳句云山連齊魯青難了樹入淮徐綠漸多

魚門太史于學無所不窺而一生以詩爲最余寄懷云
平生絕學都叅偏第一詩功海樣深寄未一月而魚門
自京師信來亦云所學惟詩自信不謀而合可謂知己
自知心心相印矣屢托余買屋金陵爲結鄰計不料在
廣州孫補山中丞招飲告以魚門歿于陝西畢撫軍署
中彼此泣下銜杯無惟因思畢公一代宗工必能取其
遺稿然魚門所刻藏園集僅十分之三耳計其未梓者
書懷云才難問生產氣不識金銀題阮吾山行卷云無
勞嘆行役行役是間時對雪云闌市收聲歸闔寂虛堂
歛抱對寒清乞假云官書百卷從擔去病牒三行有印
鈴嗚呼此乾隆三十五年假歸寓隨園以近作見示而

余所抄存者也不意竟成永訣

余戊午秋關與錫山李君時乘同寓馬姓家同登秋榜
垂五十年今歲在粵東其子邕來見訪出詩見示錄山
居二首云一從疎世事終日把犁鋤邨色牛羊外秋砧
水石餘山深遲刈麥潭冷不生魚倘有詩人至猶堪剪
萑蔬閒雲上小樓落日林塘幽溪雨蛙聲聚山風柵葉
秋一囊方朔米廿載晏嬰裘便欲烟霞外將身作隱侯
余宰江寧時候君學詩葦原年十四應童子試後夏醴
谷先生屢稱其能詩終未見也今宰新會余往相訪同

遊圭峰望海請其詩長于古風蓋深于杜韓蘇三家者

佳句云綠遮人外柳紅落渡前花狂藥看人頻動色樗
蒲到老不知名

風情之事不宜于老然借老解嘲頗可強詞奪理康節
先生妓席云花見白頭花莫笑白頭人見好花多余做
其意云若道風情老無分夕陽不合照桃花方南塘六
十歲娶妾云我已輕舟將出世得君來作挂帆人

余幼居杭州葵巷十七歲而遷居五十六歲從白下歸
重經瀟廬記幼時遊躍之場極爲寬展而此時觀之則

漱蓋已甚不知曩者何以居之恬然也偶讀陳處士古
源詩曰老經舊地都嫌小畫憶兒時似覺長乃實獲我
心云

掌科丁田澍先生乞假歸留別都人云亦知葑菲才無
棄其奈桑榆影漸低論事偶然分洛蜀交情原自比雷
陳曉鐘偕去朝天客過巷車聲枕畔聽皆妙

蘇州繆孝廉之惠妻王氏咏馬云死有千金骨生無一
顧人漫興云天有風雲常欲暮山無草木不知秋

桐城馬相如山陰沈可山少年狂放路逢親迎者不問

主人直造其家索紙筆替新婦催妝云江南詞客太翩
躚打鼓吹簫薄暮天應是天孫今夕嫁碧空飛下兩雲
仙隨郎共枕心猶怯別母牽衣淚未乾玉筋休教褪紅
粉金蓮燭下有人看娶婦家頗解事讀之大喜飲以玉
爵各贈金花一枝

余最愛言情之作讀之如桓子野聞歌輒喚奈何錄汪
可舟在外哭女云遙聞臨逝語堪哀望我殷殷日百回
死別幾時曾想到歲朝無路復歸來絕憐艱苦爲新婦
轉幸逍遙入夜臺便卽還家能見否一棺已蓋萬難開

過朱草衣故居云路繞叢祠烏雀飛依然門巷故人非
憶尋君自初交始每渡江無不見歸問疾榻前纔轉盼
談詩牕外剩斜暉絕憐童僕相隨慣未解存亡欲扣扇
沙斗初經亡友別墅云千石魚陂占水鄉四時烟景助
清光弟兄不隔東西屋賓主無分上下床關酒幾番當
皓月題詩多半在修篁今朝獨棹扁舟過回首前歡墮
渺茫厲太鴻送全謝山赴揚州云生來僧祐偏多病同
往林宗又失期兩點紅燈看漸遠暮江惆悵獨歸時王
孟亭歸興云漫理輕裝喚小舸何緣歸興轉蕭騷老來
最怕臨岐語燈半昏時酒半消宗介驟別母云垂白高
堂八十餘龍鍾有杖倚門間泣惟張口全無淚話到關
心只望書某婦送夫云君且前行莫回顧高堂有妾勸
加餐

壬辰年王光祿禮堂來白下訪江寧令陸蘭村予問有
新詩否光祿書贈內云幾載東華不自聊綠牕並坐感
蕭騷寒闥刀尺陪宵讀瓦鼎茶湯候早朝馬磨勞生還
憶共犬臺殘魄可能招却唾割肉容臣朔但把清齋學
細腰一室流塵玉漏窮更闌深掩小房櫳何妨放誕時

鄉壻聽唱風波欲惱公天畔登樓長客裏燈前擁髻只
愁中一龕底處雙栖穩雪北香南結託同又從圍句云
日占戊好軍容壯牡奉辰多典禮偕霜濃牛馬通身白
林凍烏鴉閉口喑一用毛詩一用北史俱典雅

安慶詩人以二村爲最一李嘯村菟一魯星村瑣魯五
言如久客神常倦還家似在舟鳥散雪辭竹烟消山到
門風竹不留雪水池時集鴉七言如舟行忽止水初合
牕暗還明月未沉避雪野禽低就屋忘機小鼠漸親人
皆可誦也又雀浴乘冰缺五字亦佳

嘯村工七絕其七律亦多佳句加馬齒坐叨人第一蛾
眉牕對月初三賣花市散香沿路踏月人歸影過橋春
服未成翻愛冷家書空寄不妨遲皆獨寫性靈自然清
絕腐儒以雕巧輕之豈知鈍根人正堂飲此聖藥耶乾
隆丙寅觀補亭閣學科試上江點名至嘯村笑曰久聞
秀才詩名此番考不必作四書文作詩二首可也題是
賣花吟李有句云自從賣落行人手瓦缶金樽插任君
又曰自笑不如雙粉蝶相隨猶得人朱門閣學喜拔置
一等

朱竹君學士督學皖江任滿余問所得人才公手書姓名分爲兩種樸學數人才華數人次日卽率黃秀才名戊字左君者來見美少年也其京邸夜歸云入城燈市散有客正還家新僕欲通姓嬌兒不識爺春光滿茅屋喜氣上燈花乍見翻無語徘徊月正華七言如小艇自流初住雨袂衣難受嫩情風殊有風流自賞之意

乾隆丙辰予于李敏達公處見厲子大先生時爲少同冠以家宰文恭公之子未弱冠卽入翰林詩才清妙歲除和韻云一年清課爲花忙無事花間倒百觴日落歸

鴉宜古木家貧餓鶴唳空倉楸枰靜設遲棋客綵筆吟成和省郎官柳未黃桃已爛春風早晚亦何嘗獨酌云萍分雲散故人離尊酒應憐獨酌時夜漏漸沉燒燭短殘書未了引眠遲羅江春信益梅報紙帳宵寒鶴夢知皎皎庭除餘落月屋梁相照此心期

金陵曹淡泉秀才以一夕春風煖吹紅上海棠一聯爲予所賞遂刻意爲詩贈妹云吾妹何豎淑能箴女史詞情人教織素隨嫂學烝梨母病繙經早家貧得婿遲天然心愛好常誦阿兄詩織山道中云南陌草萋萋新秋

插未齊投村先問路隔壠但聞鷄壩斷溪聲急山高日
影低夜來經雨過牛跡滿荒堤他如老牛舐犢沿修更
雛燕分巢過別家歲逢閏月春來早山背朝陽雪花遲
俱妙

桐城劉大槐耕南以古文名家程魚門讀其全集告予
曰耕南詩勝于文也聽琴云香臺初上日檐鐸受風微
好友不期至僧廬同叩扇彈琴向佛坐餘響入雲飛余
亦忘言說烏棲猶未歸獨宿云江村黃葉飛猶掩蕭齋
臥時有捕魚人攬聲牕外過真清絕也哭弟云死別漸

扉

欺初日諾長貧難作託孤人

蘇州進士薛起鳳字皆三性孤冷亡後彭尺木進士爲
梓其遺詩過范文正公祠云憂樂平生事蠶鹹志在斯
由來天下任只在秀才時對雪云天風剪水水爭飛飛
上寒山澗石衣一夜雪深迷磻道不知何處叩巖扇
金陵龔秀才元超字旭開余詩弟子也月夜云江水洗
江月荻花寒不飛林園足烟景屋宇湛霜輝戍角宵將
半溪船漁未歸沿堤采芳芷似勝北山薇送從兄酌泉
夜歸云前番不識路聞語碧蘿叢此次逢招飲啣杯紅

扉

葉中山深花木好客妙性情同歸路誰先醉應扶白髮
翁漁家云輕縠紋生玉漱斜晚風吹雨濕桃花紅裙雙
腕急搖櫓前面垂楊是妾家

杭州吳飛池學詩于樊榭先生先生愛其紅蓼花深冷
葛衣一句謂可鐫入印章其澶州雜詩云晨光黯黯樹
稀微雲帶炊烟濕不飛多少人家秋色裏滿天白露漫
柴屋過洛陽問牡丹云花濃洛下種應真我邇來時不
是春到耳盡跨顏色好未開先賞斷無人他如林間一
鳥過池面數花軟岸仄疑無路登舟以有村曉月光微

扉

難辨樹西風吹冷不知衣皆清脆可喜

余祖居杭州艮山門內大樹巷鄰有隱者桑文侯鬻粽
爲業性至孝父病膈文侯合羊脂和粥以進父死乃抱
鎗而哭人爲繪抱鎗圖微詩萬君光泰詩最佳其詞曰
羊脂數合米一匊病父在床惟噉粥父能噉粥子亦甘
粒米勝于五鼎肉升屋舉某無歸魂束薪斷火鎗寡恩
牀前呼父鎗畔哭抱鎗三日鎗猶温嗚呼恨身不作鎗
中米臨歿猶能進一匕謂鎗不聞鎗有耳

文侯之子弢甫先生性孤癖能步行百里棄主事官裏

上

糧遊五岳留別袁石峰云莫定畸人物外踪
夢魂飛入碧霞重浮雲形似世情幻秋樹色
添遊興濃白練橫過大際馬烏藤直土嶺頭
龍憑將一斗淪糜汁酒遍天門日觀峰過華
山云華山門下雨盈盈玉女秋期會玉京十
萬雲鬢梳洗罷漫空盆水一齊傾嵩洛雜詩
云鐵梁大小石縱橫似步空廊屨有聲世外
多情一明月直陪孤影到三更非深于遊山
者不能言

姬傳姚太史云詩文之道凡志奇行者易為
工傳庸德者難為巧理固然也然亦視其人之
用筆何如耳吾族

柳村有側室韓氏年逾二十即守節教子居竹
栢樓十五年而李子又愷請旌于朝又畫樓居
圖志痛一時士大夫咏其事者如雲號霜晴遺
音集此庸行也余獨愛少詹錢辛楣七古云郊
居岑蔚竹栢交秋霜轆物羣英凋小樓一燈
青不搖課兒夜誦聲呶呶柳村嶽嶽古英豪
山邱華屋如驚泡淑姬寤言矢終宵手持刀尺
敢憚勞離鸞別鵠哀弦操可憐荻影風蕭蕭
熊丸茹苦勝珍肴湛侃復見良足褒竚看紫
誥慶所遭烏頭綽楔榮光高何圖蕙草謝一
朝樓存人去魂難招郎君玉立

適園詩話卷一

三

森蘭若春輝未報心
怱怱音徽追溯情
畫插披圖展拜
恒號咷我爲歌咏
輝風騷又無錫進士
顧鈺五律第二
首云非擬懷清築
蕭然坐一林竹森
環戶翠栢古落庭
陰畫荻慈親志
登樓孝子心
當年紡績處
傾聽有遺音
柳村名永涵蘇州人

首五月中八日院完

林胤

隨園詩話卷十一

倉山居士著

古陶太尉歐陽少師之母俱以教子貴顯名傳千古然
兩母之著述不傳卽宣文夫人講解經義幾與孔子並
稱而吟咏亦無聞焉近惟畢太夫人兼而有之夫人名
藻字子湘印江令笠亭先生之女余同徵友少儀觀察
之妹也偶咏梅云出身首荷東皇賜點額親添帝女裝
首句本出無心未幾秋帆尙書果殿試第一繼王沂公
而起吉人之詞便成詩讖事亦奇矣太夫人雖在閨閣

而通達政體尙書出撫陝西太夫人作詩箴之云讀書
裕經綸學古法政治功業與文章斯道非有二汝宦久
秦中海膺封圻寄仰沐 聖主慈寵命九重賁日夕爲
汝祈冰淵慎惕厲譬諸構榑材斷小則恐敝又如任載
車失誠則懼躓捫心五夜慙報荅奚所自我聞經緯未
持重戒輕易教勅無煩苛廉察無猥細勿膠柱糾纏勿
模稜附麗端已勵清操儉德風下惠大法則小廉積誠
以去僞西土民氣淳質樸鮮糜費豐鎬有遺音人文鬱
炳蔚况逢郅治隆陶鈞綜萬類民力久普存愛養在大

吏潤澤因時立擢節善調理古人樹聲名根柢性情地

一一踐履真實心見實事千秋照汗青今古合符契不
召平生學不存温飽志上酬 高厚恩下爲家門庇我
家祖德詒箕裘罔或墜痛汝早失怙遺教幸勿棄嘆我
就衰年垂老筋力瘁曳杖看飛雲目斷泰山翠讀其詩
可謂訓詞深厚不減顏家庭誥未幾太夫人就養官署
一路關心訪察政聲聞長安父老俱稱尙書之賢太夫
人喜抵署又賦詩曰驂駢乍解路三千風物琴川慰眼
前到處聽來人語好頻年豐樂使君賢連朝話舊到更

深不盡婁江望遠心，莫怪老人添白髮。兒童幾輩換鄉音，周遭竹與花潭檻。外雲光映翠嵐，儘有瑣窗詩料在。不須回首憶江南，太夫人受封極品考終宮署庚子。上巡江浙尚書居憂里門謁于行在具陳母氏賢行。上賜經訓克家四字尚書建樓于靈巖別業以奉宸章當世榮之有培遠堂詩集行世。

培遠堂集中美不勝收摘其尤者五古如靈巖山館夜坐云：圓景下絕壁，山館忽已暝。石磴靜張琴，雪泉清淪茗。不知夜已深，月上青松頂。五律如正月十一夜云：銀

缸暗畫堂，坐數漏偏長。雁影半墻月，鷄聲萬瓦霜。夜吟多遣興，春夢不離鄉。庭下微風起，梅花入幕香。落葉云：微霜零木葉，秋氣乍蕭森。亂逐西風下，多隨涼雨深。紙意延皎月，苔磴失層陰。偶爾凭闌立，平林露遠岑。七律如小園云：小園半畝寄西城，每到春深信有情。花裡籬櫳晴放燕，柳邊樓閣曉聞鶯。漢書舊讀文猶熟，晉帖初臨手尚生。自笑爭心仍未忘，閒招鄰女對棋枰。七絕如探梅云：光福寺前日欲曛，上陽村外望細緼。千林萬壑誥無際，不辨湖光與白雲。春殘云：斐几熏鑪百衲琴，綠

陰門巷畫沉沉春來小苑無人掃花落窻前一寸深松
徑云曲徑彎環石級高滿亭山色綠周遭松風似厭泉
聲小自寫雲門百尺濤五排如雁字云一片雲藍紙鴻
文絕點瑕禽經殊古雅羽檄等紛拏每作纏聯起何曾
叙次差銜蘆如運筆游霧類塗鴉凡鳥徒貽詭家鷄詎
用誇緘情來塞北傳信向天涯四出驚風急低橫遠岫
遮諧聲呼伴侶破體遇弓韞行斷疑從缺書空點不加
奇姿多縹緲取勢故欹斜歛翰停擒藻臨池戲劃沙鵝
羣猶遜巧鳳策足聯華水映騰清稿烟籠護碧紗揆天

才不愧逸興寄雲霞五言絕如雨夜云向晚花冥冥獨
坐理琴譜一縷茶烟生疎簾散春雨六言絕如夏日作
云撥火鑪香颺來卷簾梁燕飛去吳門六月猶寒雨在
江南何處皆有清微淡遠之音真合作也其他名句五
言如望華云日生常夜半雲到祇山腰嘗新茶云未乾
春露氣猶帶曉雲香虎邱云隔花皆有閣入寺始知山
江村寓目云山吞將落日風抵欲來潮七言如梅花云
獨與白雲如有約遙疑積雪亦生香聞蟲云花徑雨過
苔乍冷豆棚風定月初明野望云雨餘霜葉紅于染風

定炊烟白欲凝靈巖懷古云香徑花開人去後
蝶廊風響月明中登澄觀樓云積雪明多能淡日遠山寒極不生烟

仁和沈椒園庭芳查聲山學士外孫也其尊甫麟洲先生宰文昌被累戍寧夏母查太淑人留居嘉善不從行椒園每歲南北省親極行路之苦有詩云秋生紅豆辭南國春到青銅赴朔方青銅者寧夏山名又雲影有心隨望眼淚痕和綫縱征衣爲厲樊榭孝廉所賞沈歿後張少儀有詩哭之云塞上草枯雙淚白瀛州雲淨一襟

清草枯用斐字野事蓋紀實也觀察尊甫笠亭先生宰印江與沈全戍觀察徒跣萬里號呼求救卒獲安全嗚呼三君皆與余同舉詞科而沈張兩觀察又同舉詩社于李玉洲先生家往來尤狎今皆先後化去追思六十年中升沉聚散音塵若夢可爲於邑張母顧恭人若憲卽畢太夫人母也有挹翠閣集與武林林以寧顧似齋名隨宦牂牁卒于官所太夫人有得黔中信二首最悽惻詩云黔中驛使到腸斷血沾襟絕域懷歸意頻年憶女心不曾虛藥物猶爲寄華簪悽絕離亭語迢迢遂至

今官舍于山外飄飄丹旒懸望雲空白髮繞膝待黃泉
猶有清吟在應教彤管傳阿兄歸日近負土在明年其
後尚書迎養秦關少儀自滇中解組來署白頭兄妹唱
和終朝太夫人又作云千里迢遙客乍回相逢歲盡筭
眉開廿年髮逐梅花白一夜春隨爆竹來誰料異鄉逢
雁序細談舊事劃鑪灰殷勤傳語司更者漏箭城頭莫
浪催

吳中詩學婁東爲盛二百年來前有鳳洲繼有梅村今
繼之者其弇山尚書乎過吳祭酒舊邸詩云我是婁東
吟社客瓣香私淑不勝情其以兩公自命可知然兩公
僅有文學而無功勳則尚書過之遠矣尚書雖擁節鉞
勤王事未嘗一日釋書不觀手披口誦刻苦過于諸生
詩編三十二卷曰靈巖山人詩集靈巖者尚書早歲讀
書地也

蔣用菴有句云花以春秋分早晚天于才命各升沉斯
言是也然有才無命終不能展布經綸徐英公遣將必
用方面大耳者曰取彼福力成我功名余按嵩陽毒地
也代公到而龍遠徙樂陽苦泉也房豹臨而味變甘此

其明效也 天子知弇山尙書最深故中州奇荒移公
 于秦中荊州水災移公于楚省公所到處便能變醜養
 瘠元氣昭回古今人若合一轍然非有至誠慘怛之懷
 亦不能上格天心而下孚民望公有荊州逆事詩十首
 仁人之言不愧次山春陵行今錄其八云一色長天接
 混茫登高無地問蒼蒼突如禍比焚巢慘蠢爾危于破
 釜忙海市應開新聚落渚宮重見小滄桑最憐牙繡烏
 臺客披髮何由訴大荒魯侍御贊之全家留沒涼颼日暮暗凄其
 棺窆縱橫滿路岐饑鼠伏倉餐腐粟亂魚吹浪逐浮屍

神燈示現天開網

聞水患前數日江上時有神燈來往

息壤難埋地絕維

那料存亡關片客萬家骨肉痛流離浪頭高壓望江樓
 眷屬都羈水府囚人鬼黃泉爭路出蛟龍白日上城遊
 悲哉極目秋爲氣逝者傷心淚迸流不是乘桴便升屋
 此生始信卽浮漚生生死死萬情牽騷客酸吟哀郢篇
 慈筏津迷登彼岸濫觴勢蹶竟滔天不知骨化泥塗內
 祇道身經降割前此去江流分九派魂歸何處識窮泉
 雲夢蒼茫八九吞半皆餓口半遊魂鮫綃有淚珠應滴
 鰲足無功極恐翻救急城填成死劫劈空刀落得生門

若非帝力宏慈福十萬蒼靈幾個存
手勅親封遣上公勤民堂陛一心通
金錢內府催加賑版築冬官記
考工有欲犀然窮罔象肯教鵠結哭鴻蒙
宵衣五夜批章奏飢溺真如一已同
大工重議築方城免使虫氓祝癸庚
涼月千家發婦淚清霜萬杵役夫聲
蟻生漸整新槐穴虎旅重開舊柳營
我有孝侯三尺劍誓將踏浪斬長鯨
江水茫茫烟靄深紙錢吹滿挂楓林
寃埋魚腹彈湘怨哀譜鴻鳴寫楚吟
南國鄭圖膏雨迷西風潘髻鏡霜侵
莫嗟病骨支離甚康濟儒生本素心

古名臣共事一方賡唱疊和最爲佳話
唐白太傅刺杭州而元相觀察浙東彼此以詩往來爲昇平盛事近日秋帆尙書總督兩湖適蒙古惠椿亭中丞來撫湖北致相得也尙書知余作詩話因寄中丞詩見示讀之欽爲名手僅錄其過哈密云西扼雄關第一區鞭絲遙指認伊吾當年雁磧勞戎馬此日人烟入版圖路向車師雲黯淡天連吐谷雪糶糊寒威陣陣催征騎不問村驂尙有無過潼關云百二秦關萬古雄片帆黃水渡西風馬嘶沙岸寒濤外人倚山城夕照中眼界一時窮古磧爪

痕三度笑飛鴻余自滄中往返並此凡三次來朝又入華陰道飽看

霜林幾樹紅果子溝云山勢嶙峋水勢西過溝百里屬

伊犁斷橋積雪迷人迹古澗堆冰碍馬蹄驛騎送迎多

舊雨征衫檢點半春泥數間板閣風燈裏猶有閒情倚

醉題中丞早歲工詩後即立功青海伊犁及天山南北

凡古之月支鄯善足迹殆徧以故以所見聞彰諸吟咏

宜其沈雄古健足可上凌七子下接黃門矣

中丞詩不專一體亦有清微委婉得中唐神味者如靜

坐云夕陽留戀最高枝簾影垂垂小困時夢裡不忘身

是客鏡中怕見髮如絲黃花秋綻東籬早紫塞人憐北

雁遲悄燕一爐香靜坐篆烟縷縷結相思秋宵云離懷

輕易豈能休打疊新愁換舊愁宿酒大都隨夢醒殘燈

多半為詩留月扶花影偏憐夜風得棋聲亦帶秋漸覺

宵寒禁不起笑披鶴氅也溫柔過華峯題壁云主人愛

客獨超羣小隊招邀過渭汾三十六峯無所贈隨緣分

與一溪雲題畫云誰家亭子碧山巔白板橋通屋幾椽

遠樹層層山半角杖藜人立夕陽天其他佳句如柳圍

雙沼水花掩一房山渡口雲連春草碧波心浪湧夕陽

隱居詩話卷一

紅皆可傳也

湖北東望之方伯爲其年檢討之後人詩才清妙綽有
家風官楚時適與畢惠兩公共事可謂天與詩人作合
也第方伯詩余只錄見贈佳句入三卷中此外未窺全
豹忽有松江廖某持養鶴圖見題中有方伯一絕云美
人自結歲寒盟入座雲山照眼明料理鶴糧門盡掩松
花如雨撲簾旌清脆絕塵嘗鼎一臠亦可知味矣

畢尚書宏獎風流一時學士文人趨之如鶩尚書已刻
黃仲則等八人詩號吳會英才集此外尚有吳下張琦

字映山者亦在幕中生平不甚讀書而工作韻語五言
如咏簾云西北小紅樓湘簾懶上鈎織成千縷恨添得
一層愁夜逗玲瓏月風寄瑣碎秋鑪香隔不斷偷出畫
檐浮七律如登妙高臺云海門中折大江開浩浩風濤
白雪堆樓閣自盤飛鳥上淮徐爭送好山來千秋弔古
空搔首二月懷人正落梅滿池江湖雙白眼與誰同覆
掌中盃夏日感懷云笠澤湖邊是我家釣竿魚艇足生
涯酒泉戀酒不歸去開過幾番菡萏花和人寒食憶舊
云春好因尋方外交小樓高出萬松梢山童遙指向予

笑開士作家如鳥巢六橋春水曲還通載酒舟行夕照
中指點鶯聲好樓閣小桃斜出一枝紅醉筆燈前雜草
行已聞遙巷一鷄鳴登床倘有夢歸去好趁半街殘月
明遊鸞園云峯巒曲折水淙淙花映藩籬竹映窻最好
小亭東北望青山缺處露秋江五言絕句咏溫泉云欲
訪阿房跡平原烟樹昏楚人一炬後贏得水長溫

映山弟名瑗字慕蘧予于吳門見之聽其言令人不衣
自煖詩有家風道中云人家屈曲居山腹客騎盤旋走
樹頭舟中云遠灘沙漲疑分港順水帆飛似逆流應山
道中云危峯有路人烟少破廟無門水鳥棲黃鶴樓云
巴蜀浪歎天欲濕荆襄雲起樹全無題高校書小照云
胭脂山接楚王宮人好先知境不同一閣峇岩開曲曲
春深門閉百花中

王夢樓從雲南歸嘗誦寶意先生憶舊一絕云鶯花庭
院綺羅年箏語琴心記不全勝有舊時金屈戌畫樓深
鏡五更天

上元有任東白者哭方行之云此口曾無杯酒莫夜臺
應諒故人貧陳古漁爲予誦而傷之未幾任亦死

隱僻之典作詩文者不可用而看詩文者不可不知有人誦明季楊維斗先生詩曰吾官蘿蔔火咳唾地榆生所用何書余按北史魏昭成皇帝所唾處地皆生榆蘿蔔火不知所出後二十年閩洞微志齊州有人病狂夢見紅裳女子引入宮中歌曰五靈樓閣曉玲瓏天府由來是此中惆悵悶懷言不盡一丸蘿蔔火吾宮旁一道士云君犯大麥毒也少女心神小姑脾神知蘿蔔制麴毒故曰火吾宮火者毀也狂者醒而食蘿蔔病遂愈夏醴谷先生督學楚中歲試題象日以殺舜爲事有一生

文云象不徒殺之以水而并殺之以火也不徒殺之于火而又殺之以酒也幕中閱文者大笑欲批抹而置之劣等夏公不可曰恐有出處且看作何對法其對比云舜不得于母而遂不得于父也舜雖不得于弟而幸而有得于妹也通篇文亦奇警夏公改置一等欲召而問之而其人已遠出矣余按舜妹駮首與舜相得載帝王世紀祖君彥檄煬帝云蘭陵公主逼幸告終不圖駮首之賢反蒙齊襄之恥是此典六朝人已用之惟以酒殺舜不知何出又十餘年讀馬駮譯史方知象飲舜以藥

酒見劉向列女傳

許太夫人夜坐云瘦削吟眉詩滿腔春燈獨坐影幢幢
可憐落月橫斜照畫稿分明印紙窻畢太夫人夜坐云
晚睡纔興理髻鴉侍兒擎到雨前茶愛看寫月桃花影
移上紅窻六扇紗兩詩工力悉敵

嚴東有選宋人萬首絕句採取最博余流覽說部嫌有
遺珠爲錄數十首以補其缺未及交付東有已亡乃做
王漁洋池北偶談採宋絕句之例以補之其題其作者
姓名俱不省記也其詩云鎖日尋春不見春芒鞋踏遍

隴頭雲歸來偶過梅花下春在枝頭已十分昨日厨中
乏短供嬌兒啼哭飯籬空阿娘招手向兒道爺有新詩
上相公十年山館始圍牆竹裡開門筭最長一輛小車
行得過不愁花露濕衣裳行盡疎籬見小橋綠楊深處
有紅蕉分明眼界無分別安置心頭不肯消白頭波上
白頭翁家逐解移浦浦風一尺鱸魚新釣得兒孫吹火
荻蘆中桃花雨過碎紅飛半逐溪流半染泥何處飛來
雙燕子一時含到畫梁西金針刺破南牕紙偷引寒梅
一陣香蠅蟻也知春富貴倒拖花片上宮牆白雲山上

白雲泉自無心雲自閒何必奔流下山去又添波痕
在人間與郎相期月上時及至月上郎不知妾在平地
見月早郎在深山見月遲風急雲驚雨不成覺來春夢
甚分明當時苦恨銀屏影遮隔仙娥只聽鶯寄語沙邊
鷗鷺羣也須從此斷知聞諸公有意除鈞黨甲乙推排
恐到君浪靜風平月正中自搖柔櫓駕孤篷若非三萬
六千頃把甚江湖着此翁小桃無主自開花烟草茫茫
帶晚霞幾處敗垣圍故井向來一一是人家校獵山陰
幾度春雕弓羽箭不離身於今老去渾無力看見飛鴻
指示人鳴鶴直上三千尺風緊秋高雪正乾碧眼胡兒
三百騎盡提金勒向雲看寒林斜日欲啼鳥壁裡青燈
乍有無小雨悄悄人不寐卧聽離馬齧殘芻桑麻不擾
歲常登邊將無功吏不能四十二年如夢醒春風吹淚
過昭陵繡袖翩翩上翠柵舞姬猶是舊精神座中莫怪
無歡意我與將軍是故人相思無路莫相思風裡楊花
只片時惆悵深閨獨歸客曉鶯啼斷落花枝屬時花香
莫過牆隔牆人正繡鴛鴦聞香定要停針線繡不成雙
不寄將花飛一片減春光信逐春風送夕陽莫放珠簾

隱園詩話卷一
遮燕子好教含得上雕梁春風永巷閉娉婷長使青樓
誤得名不惜捲簾通一顧怕君若眼未分明南隣北舍
牡丹開年少尋芳日幾回惟有君家老松樹春風來似
未曾來霧裡江山看不真只憑鷄犬認前村渡船滿板
霜如雪印我青鞋第一痕牛渚磯邊渺渺秋笛聲吹月
下中流西風不識張京兆畫得蛾眉如許愁未得霜晴
不是晴霜晴無復點雲生鷺鷥不遣魚驚散移脚惟愁
水作聲竹裡茅茨竹外溪鄰鄰白日護魚磯想因日日
來垂釣石上蓑衣不帶歸春山靈草百花香誰識仙家
日月長滿院莓苔綠陰匝棋聲何處隔宮牆田家汨汨
水流渾一樹高花明遠村雲意不知殘照好却將微雨
送黃昏小白長紅又滿枝築毬場外獨支頤春風白是
人間客王張繁華得幾時月圓新碾淪花甕飲罷呼兒
課楚詞風定小軒無落葉青蟲相對吐秋絲夜涼吹笛
千山月路暗迷人百種花暮罷不知人換世酒闌無奈
客思家胡虜安知鼎重輕指蹤先白漢公卿襄陽耆舊
惟龐老受禪碑中無姓名欲挂衣冠神武門先尋水竹
澗南村却將舊斬樓闌劔買得黃牛教子孫二年春事

又成空擁鼻微吟半醉中夾道桃花新雨過馬蹄無處
避殘紅簾裡孤燈覺晚遲獨眠留得畫殘眉珊瑚枕上
驚殘夢認得蕭郎馬過時淡黃越紙打殘碑都是先王
御製詩白髮內人含淚讀爲會親見寫詩時

唐開元之治輔之者宋璟以德姚崇以才張說以文皆
稱賢相本朝巡撫蘇州者湯潛菴以德宋牧仲以文
皆中州人也近日中州胡雲坡司寇秉臬蘇州繼二公
而起政簡刑清屢開文宴一時名士如平瑤海太史顧
星橋進士時時過從余至吳門必招赴會公領尙書後

都中猶寄懷云過江名士久推袁吳下相逢月滿軒鸞
掖文章留舊價倉山著述綜羣言平生契合惟元老半
世栖遲爲壽萱我上燕臺每南望最關情處是隨園後
又寄扈從紀事詩十二首來不作頌揚泛語自出心裁
從園云一望燈光列星斗始知身在五雲邊想見待漏
晨趨身傍九霄之光景策馬上山尋別路忽聞絕壑響
松濤想見熱處冷行不爭衝要之識力至于才過殘月
又新月幾度排班看打圍則又明寫湛露龍光晝日三
接之恩榮焉有札命余和韻余以詩貴清真目所未瞻

身所未到不敢牙牙學語婢作夫人故不敢作也

携李顧牧雲流寓襄陽一日獨遊隆中憑弔武侯遺跡
避雨臨龍岡見山腰有茅庵一叟出迎風貌奇古正欲
與言則菴側蹲一猛虎顧驚且仆老翁笑曰子無懼此
虎已歸依我作弟子矣且曰知子能詩盍題數言見贈
顧辭以目疾翁取几上芋與食命賸坐一刻開眼果察
秋毫顧異之卽題石壁云一衣一鉢一軍持雲水天涯
任所之莫笑道人無侶伴新收猛虎作童兒偶向山前
咒毒龍風雷欲拔萬株松須臾明月當空起歸到茅簷

打晚鐘翁留宿菴中臨別日明年正月上寅日吾開丹
爐與子服一粒體輕成仙勿忘此囑次年及期赴約行
未十里風雪大作山無行徑又恐老翁不在猛虎獨在
悵悵而返後十餘年目漸昏體漸衰悔從前向道之心
不勇又賦詩云老堪嗟駐顏何處覓丹砂老堪惱五官
雖具無一好凋零渾似過時花憔悴不殊霜後草手頻
戰頭屢顛行來蹙蹙足不前自憎容貌改人惡性情偏
吁嗟乎我今八十已如此愁煞蓬萊千歲仙

毛詩伐木章有求其友聲之語杜陵有文章有神之句

余初不信此言後歷名場五十年方知古人非欺我也
戊申八月年家子許香岩告余云其同鄉程菽園明府
宰武進六月望後苦熱移榻桑影山房讀小倉山房詩
而愛之夜夢題後云吟壇甌北及新畬盟主當時讓本
初搏古爲丸知力大愛才苦命見心虛仙人偶戲蓬壺
頂下士爭酣墨瀋餘格調不能名一體香山竊比意何
如程之同年法時帆學士與書云自惠小倉山房集一
時都中同人借閱無虛日現在已鈔副本洛陽紙貴索
詩稿者盈集幾不可當可否再惠一部何如外題拙集

後云萬事看如水一情生作春公卿多後輩湖海有幽
人筆陣驅羣屐詞鋒怖鬼神莫驚才力猛今世有誰倫
此二人者素不識而皆因詩句流傳牽連而至豈非文
字之緣比骨肉妻孥尤爲真切耶又有皖江魯沂者見
贈云此地在城如在野其人非佛亦非仙却切隨園菽
園名明懷孝感人時帆名式善滿洲人

有僧見院亭先生自稱應酬之忙頗以爲苦先生戲云
和尚如此煩擾何不出家聞者大笑余按楊誠齋有句
云袈裟未着嫌多事着了袈裟事更多

虞山趙再白孝廉作詩如武侯出師志吞吳魏而氣力
不足摘其中秋呈鄂文端公云樓虛貯月光常滿水澗
洒星影自臻可謂頌揚得體真州朝陽樓云萬重山去
圍如海千里江來折到樓自嘲云名士本來如畫餅古
人原不好真龍又渡江有水立不動天無容七字殊奇
曾爲余誦鄂公未遇時句云一飯便留客得錢仍與人
相公氣局之大早可想見

齊田駢不屑仕宦而家甚富或戲之曰臣隣女貌稱不
嫁行年三十而有七子不嫁則不嫁然而嫁過畢矣今

先生設爲不宦嘗養于鍾不宦則不宦而宦過畢矣孫
芷亭仿其意味息夫人云無言空有淚兒女聚成行

沈永之與余同榜五十年官雲南驛鹽道乞病歸途中
信來道生一女適余生阿遲念二人俱是公豚暮鷄遂
相訂爲婚沈寄詩云天留巖境與公嘗六十逾三學弄
璋又曰蘭譜同年交最舊錦綉合璧事尤奇未幾沈來
山中云女爲旁妻殷氏所出本籍江寧父某康熙間作
雲南守備僑居滇中年八十餘聞沈失配願以女供箕
帚沈辭年老殷強勸不已問何故曰我本江南人墳墓

現在金陵公南人也以女從公庶幾留江南一脈耳嗟
當殷翁起念時豈料真有余之僑居江寧者一段因緣
哉天下事巧湊之奇往往如此爲賦感婚長篇中數句
云果然此老嬉遊處安置他家女外孫萬里合教青鳥
使一函先報白頭人殷夫人號稱國色携其女來隨園
相壻故又云嬌娃抱出珠相似阿母全來花兒羞沈得
詩以示梁瑤峯相公公連讀此二句音較響胡雲坡尙
書在座不覺大笑

金陵太守謝鍾抵任時索余對聯余贈云太守風清江

左依然迎謝傅先生來晚山中久已卧袁安陳省齋先
生繼其父署守鎮江余代作對聯云守郡繼先人問江
水長流剩幾個當年父老析薪綿世澤願黃堂少住留
一枝此日甘棠

偶過竹林寺見題壁云曉來一雨動新涼獨展殘編坐
竹房無數風枝墮殘滴紅闌干外卽瀟湘或云此近人
趙曾瞻詩也

李方膺明府善畫梅性傲岸而與余交好歿後其子某
見贈云記得先君交兩友一子才子一梅花殊有風趣

有郭耕禮者嫌其稱父執之字爲不恭余曰仲尼祖述堯舜子思且字其祖矣何不恭之有

桐城張文和公七十壽辰 上賜對聯云潞國晚年猶

矍鑠呂端大事不糊塗常州陳文恭公薨 上賜對聯

云執笏無慚真宰相蓋棺還是老書生梁文莊公乞假

養親 上賜詩云翻祝還朝晚卿家慶更深

予幼時大母常爲予言大父旦釜公性豪俠與沈適聲

秀才交好秀才中表楊大姑有文君夜奔之事託先祖

爲之道地楊繼足夜行不能踰溝先祖助沈爲扶而過

之事發藏匿余家大姑纖腰美盼吐屬嫺雅大母亦憐

愛之母家訟子官太守某惡其越一鸞與駐防旗下大

姑佯狂披髮自啖其溺旗人不能容沈暗遣人買歸終

爲夫婦生一女而亡後閱香祖筆記載此事稱武林女

子王倩玉者蓋卽楊氏諱其姓爲王也其寄沈長相思

一曲云見時羞別時愁不轉千回不自由教奴爭罷休

懶梳頭怕凝眸月光中上小樓思君楓葉秋

戊申過虞山竹橋太史薦士六人孫子瀟長千里云門

前春風其來矣珠箔無人自捲起對酒云黃金能買如

花人不能買取花時春陳聲和西莊草堂云水高帆過
當窻影風起花傳隔岸香偶成云生怕曉風吹絮落願
爲殘燭照花眠皆少年未易才也

余不耐學詞嫌其必依譜而填故也然愛人有佳作老
友何獻葵之長郎名承燕者其壽內云紙閣蘆簾偕老
欣欣十載於茲筭百年荏苒三分去矣半生辛苦兩箇
同之弄杼秋宵檢書寒夜常伴窻前月半規慚相對把
青雲穩步望了多時今宵喜溢雙眉是三十平頭設笑悅
期記去年壽我一杯新釀我今壽爾一曲清詞爾本荆

釵我非絳袴風味儒家類若斯還堪笑梅花遠屋又
放枝枝春雨云簾外輕寒傍晚多試問鸚歌春色如何
爲言昨夜雨婆娑紅了庭柯綠了檣蘿流水茫茫捲逝
波春事蹉跎花事蹉跎尋芳休待楚雲過放下香螺披
上烟蓑留鬢云馬齒頻加鵬程屢蹶還容爾面添何物
丈夫欲表必留鬢試問那個些兒沒窺鏡多慚染髮誰
拂鬢彙博得羅敷悅從今但擬學詩人間吟便好將他
捋咏眼鏡云非關四十視茫茫也欲借君光自從與子
囊中相處一鑑休亡誰爲白眼誰青眼相對總無妨闕

西園詩話卷十一
人世上觀書燈下只怕心盲吸烟美人云吐納櫻唇氛
氲蘭氣玉纖握處堪憐脂香粉澤分外覺清妍豈是陽
臺行雨剛來自十二峯邊闌干外風鬟霧鬢猶自繞雲
烟流連怎禁得相思暗結閒悶難搗笑消遣春愁此最
爲先怪底鴛鴦綉倦停針坐便爾情牽恰喜有知心小
婢一笑透婬娟無題云遮遮掩掩心下難拋秋一點微
露鞋尖妾隔珠簾郎轉簾簾垂人遠只道四風吹不捲
風更風流不捲簾兒誓不依記黃仲則有禽言斷句云
誰是哥哥莫喚生疎客尖新至此令人欲笑

皇甫古尊在金陵市上得金字扇一柄乃前朝名妓徐
翩翩所書扇尾署名曰金陵蕩子婦某古尊喜甚求題
於厲太鴻先生得賣花聲一闕云花月秣陵秋十四妝
樓青溪迴抱板橋頭舊日徐娘無覓處芳草生愁金粉
一時休團扇誰留婦人只有小銀鈎句尾可憐書蕩婦
似訴漂流余讀之不覺魂消亦以掩扇上女圖索題先
生爲填南鄉子云思夢髻慵梳鸚鵡驚回依井梧扇影
似人人似月圓初十六盈盈十五餘並帶點紅葉更有
關心好句書不用近前頻掩面生疎水院雲廊見也無

心餘未入翰林時彼此相慕未見寄長調四首來其賀
新涼云詎向秦淮水問何人小樓吹笛勸入愁死雨皺
嵐皺多假蹇我與蔣山相似白下柳又添憔悴却到江
山奇絕處遇雙鬟都唱袁才子情至者竟如此 羅衫
團扇傳名字比風流淮南書記蘇州刺史常聽東華故
人說腸斷江南花底何苦較天都人世樓閣虛無平等
看謫塵寰終是神仙耳花落恨莫提起百字令云才人
爲政莫宦成三十居然不朽互聽參觀如善射轉側皆
能入殼游戲奇情循良小傳千里傳人口西清餘子旁

觀且袖雙手

底事拋擲西湖勾留南國展放林端驢

六代青山橫淺黛都做袁家新婦酒客清豪名姬窮窶
小令歌紅豆香名艷福幾人兼此消受夢芙蓉云忽拜
魚書既有十分思憶十分惆悵不曾相識相識如何樣
泛詞源春漲十隊飛仙旗仗情至文生縱編珠組繡排
比亦清曠 眼底金剛紛變相問誰能寂坐蓮幢上低
首前賢焉敢角瑜亮幾人憐跌宕難覓酒樓歌舫一卷
新詞待求君按節分遣小紅唱邁陂塘云揀鄉山絕無
佳處躬耕又乏南畝塵容俗狀真難耐待覓灌夫行酒

尋犀首奈泪灑黃墟漸失論文友
小人有母但北望京華徘徊小院
寂寞倚南斗一食肉者俊物龕才
都有半是望秋滿柳東塗西抹年
華改說甚色絲蘿日牛馬走約丁
字簾前共剪春盤悲故人歸否唱
山抹微雲大江東去準脩擬秦九
謂礪泉同年

乾隆戊辰李君宗典權知甘泉書
來道女子王姓者有專在官可作
小星之贈予買舟揚州見此女子
于觀音菴與阿母同居年十九風
致媽然任予平視挽衣掠髮了無
忤意欲娶之而以膚色稍次故中
止及解纜到蘇州

重遣人相訪則已爲江東小吏所
得余爲作滿江紅一闕云我負卿
卿撐船去曉風殘雪曾記得庵門
初啟嬾娟方出玉手自翻紅翠袖
粉香聽摸風前頰問姮娥何事不
嬌羞情難說旣已別還相憶重訪
舊查無跡說廬江小吏公然折得
珠落掌中偏不取花看人採方知
惜笑平生雙眼太孤高嗟何益

隨園四面無墻以山勢高低難加
磚石故也每至春秋佳日士女如
雲主人亦聽其往來全無遮闌惟
綠淨軒環房二十三間非相識者
不能遽到因摘晚唐人詩句

作對聯云放鶴去尋三島客任人來看四時花
舒城沈生本陸字季堂年已艾矣戊申秋以詩求見各
體俱工古風如白石山古栢行等篇詩長不能備錄五
言如西施洞云香草美人遠春山古洞寒見贈云記吟
詩句從黃口得傍門墻已白頭俱妙餘三首已采入續
同人集中其祖名長祚者康熙間舉鴻博有竹香園集
過友人草堂云春雲遮不盡柳色認君家到逕聽微雨
開門見落花古心微直諒問語及桑麻飲量年來減村
醪莫更賒吳友云修短難將理問天人間福慧應難全

他生好向空王乞少占才華自永年

張南垣以畫法壘石見者疑爲神工吳梅村黃梨洲皆
爲之傳載交集中太倉蘿菴園爲王麟洲奉常別業園
中假山南垣遺製後歸弁山尙書爲奉母地更名靜逸
園畢太夫人秋日閒居詩題五律云勝跡留城市幽居
得小園吾生澹相寄往事漫追論人憶烏衣舊名隣香
草存祇今耽靜逸秋景滿邱樊字摹王內史詩愛鄭都
官石色青書幌花陰冷畫闌池魚一二寸庭竹兩三竿
于此端居好身閒夢亦安地迥人稀到風清暑罷侵竹

簾香細細、桐閣綠情情、隱几時看畫、安弦靜譜、琴夜涼、
明月上、掃石坐深休、磴小花枝密、廊深書舍藏、有時翻
秘帙、隨意坐匡牀、詩遇前春、豪鑑凝、隔夜香、庭尊尊石
丈、親見歷滄桑、

金陵秋試之年、上下江名士畢集、余止而觴之、各有贈
詩、約三千餘首、其尤佳者、梓入續同人集矣、尚有斷句
可采者、如虞山王陸禔云、叢叢著述皆千古、草草功名
只十年、長洲顧星橋云、渡江名士推前輩、扶輦門生半
少年、王又云、休夸翁子乘車日、已是懸車十七年、三押

年字俱妙、金陵管松年云、四海文章經日貴、百年心事
問花知、無錫徐曷云、姓氏直疑前代客、語言妙是一家
詩、青陽程蔚云、一蔣治績乘時著、便把塵緣當夢看、
以部婁擬泰山、人人知其不倫、然在部婁、私心未嘗不
自喜也、秋帆尚書德位兼隆、主持風雅、枚山澤之癯、何
能及萬分之一、乃詩人好相提而並論、孫淵如太史云、
惟有先生與開府、許教人吐氣如虹、徐朗齋孝廉云、身
山制府倉山叟、海內龍門兩扇開、

壬戌年、余改官外出、客送詩者、動以王媯見戲、余因口

號云琵琶一曲靖邊塵欲報君恩屢顧身只是內家
妝束改回頭羞見漢宮人後十年再入朝則鳳池諸
客都非舊人又戲吟云曉日曛騰玉殿開春風回首認
蓬萊三千宮女如花貌都是明妃去後來

張文敏公全南華先生上朝值春雪初霽南華見午
門外簷下冰柱賦七律一章文敏公疑為宿構南華請
面試文敏出所佩小玉羊為題南華應聲云宛爾成形
質居然或寢訛方欲續下而皇上有旨命和湯圓詩
南華在朝房立進二十四韻警句云甘白俱能受升

沉總不驚文敏嘆服曰不料倉卒間先生猶能自見身
分也為序其集云春雨着物萬花怒開神工鬼斧不可
思議似之者病學之者死

秋帆尚書撫陝時有上元燈詞十首莊重高華是金華
殿上語一時幕中學士文人俱不能和為錄四章云碧
榭紅闌萬點明戟門蓮漏轉三更交春便抱祈年意不
聽歌聲聽雨聲鼓鉦殷地走輕雷寶燄千枝百戲開
見廣場波浪直雙龍爭挾火珠來仙館明輝麗絳霄銅
駝四角綴瓊翹夜長樺燭添寒燄春曉終南雪未消十

年持節駐秦關，夢斷蓬瀛供奉班。記得披香頻侍宴，紅雲萬朵駕鰲山。

斐二知中丞巡撫皖江，每至隨園，依依不去。舉家工琴，閨閣中淡如儒素。其子婦沈岫，雲能詩，著有雙清閣集。途中日暮，云薄暮行人倦，長途景尙賒。條峯疎夕照，汾水散冰花。春暖香迎蝶，天空陣起鴉。此身圖畫裏，便擬問仙家。在滇中送中丞樞歸，云丹旄秋風返故鄉，長途悽惻斷人腸。朝行野霧籠殘月，暮宿寒雲掩夕陽。蝴蝶紙錢飄萬里，杜鵑血淚落千行。軍民沿路還私祭，豈獨

兒家意慄傷。讀之不特詩筆清新，而中丞之惠政在滇，亦可想見。余方采閨秀詩，公子取其詩見寄，而夫人不欲以文翰自矜。公子戲題云：偷寄香閨詩冊子，粧臺伴問目稍曠，亦佳話也。中丞名宗錫，山西人。

韓慕廬尙書，雖爲徐健庵司寇所識拔，而在朝中立不倚于牛李之黨，兩無所附。然官爵崇隆，終身平善，可知士途之不須奔競也。近今張警堂先生以縣令起家，官至監司，皆委懷任運，不營求而自得。詩才清妙，過廬生廟云：快馬衝風急，添衣禦曉寒。平生無好夢，醒眼過邯鄲。

聊其襟懷之淡定可知矣又宜城夜行云夜半張燈起
披衣上馬鞍月明如欲曙風歛不知寒此景人誰見長
途心轉安襄陽舊遊處明日且盤桓劉霞裳秀才出公
門下仿其意作鉛山夜行云車比龔九仄心閒坐頗安
清冰明似鏡凍月小于丸燈遠知村到更深喚渡難漸
看浮艸白霜重夜將闌可謂工于竊比者矣先生又過
銅雀臺云可憐腸斷分香日輸與開門放婢人使老瞞
在九原爲之汗下先生名銘江西已卯孝廉
金陵張止原居士立身端謹爲秋帆尚書所重以家政

託之常臘底冒雨招余遊靈巖山館其襟懷可想舟中
誦其春暮書事云山苑濃陰覆綠苔意行敷坐自徘徊
池邊柳弱鶯難駐庭畔花殘蝶未回酒盞怕空先料理
柴門喜靜且長開人生得喪何須計一任浮雲過眼來
步尚書青門柳枝韻云綠烟漠漠裊晴嵐紫陌輕陰月
正三怕上樂遊原上望引人離恨到江南居士名復純
兼通醫理工賞鑑

壬寅冬余遊雉臯何春巢引見其親家徐湘圃司馬其
人吐氣如虹不可一世家有園亭之勝招致名姝宴飲

竟夜見贈云一病經年喜再生西風吹客過江城虎溪
大笑酬前願雁宕間遊寄遠情荒徑漫勞攜杖訪傾心
不待整冠迎夜來天際文星聚珠玉驚聞擲地聲
空林亂葉聲相逢慰我寂寥情多邀紅袖同行酒小摘
寒蔬爲煮羹對月且拚三五夜看花莫問短長更幽懷
萬種愁千斛不遇先生不肖鳴

四
月
十
九
日
閱
此
卷

四月十九日閱此卷

時風雨凄然

述齋

